

أنا (و.ع) 50 عام، فقدت من عيشتي 62 شخص. طلعت قبل أكثر من شهر من غزة عبر المعبر المصري (رفع)، كثير غلبونا، وصلنا الساعة 10 الصبح، وطلعنا من عندهم الساعة 9 ونص بالليل. يمكن يا دوب 200 شخص كان في بالمعبر.

قعدت بالحرب 68 يوم أو 69 يوم. كان كل يوم، عن 100 سنة. كل دقيقة مرت علينا، فيها وجع وألم، وفيها صعوبات كثيرة. عشنا حياة ما كنت بتخيل بيوم من الأيام إني أعيشها. كنت دايمًا بغزة أقول إنه هاد أصعب وضع بنعيشه، ولكن بالحرب هاي تمنينا نرجع للصعب اللي كنا مرة نعيشه. هاي ما كانت حرب عادية، هاي إبادة، عشنا كل الأوجاع، نفسي وجسدي.

حرب بشعة بشعة، بمعنى الكلمة. هاي الحرب بشعة بكل ظروفها، بس ما في مصطلح يوصفها ويوصف وجعها وألمها، كلمة بشعة قليلة عليها.

ذل، إهانة، نزوع. أنا نزحت 3 مرات. أنا دائمًا كنت ألوم أهلي كيف بال 48 نزحوا، لي ما بقىوا؟ بس لما إحنا أجبرنا ننزع، فهمت إنه إحنا نفسهم، هينا أجبرنا ننزع من بيوتنا. بدي أوصفك قديش النزوع مؤلم لإلي. أهلي من قضاء الرملية، من قرية مهجرة اسمها المغار، والدتي ووالدي لاجئين، التين من نفس القرية.

نعيش ونحكي

شهادات نساء من غزة

أنا من بداية الحرب بديت أعيط وأقول الله يعينا من اللي جاي،
كنت كثير متخوفة، قعدنا بيتنا اللي إحنا فيه اللي بنتمنى
نرجعله واللي هو راح. قعدنا 3 أيام فيه من بداية الحرب، في
يوم الساعة 2:30 بالليل، ما لاقينا البيت إلا بنزل فوقنا، ومعنا
أطفال. عشر بيوت راحوا، مربع كامل. حزام نارِي. الناس اللي
فيهم راحوا بالأرض تراب. بيتنا نزل أكثر من نصه، وبهادا اليوم
بقينا عايشين.

بعد هيك نظفنا البيت وشلنا التراب وقعدنا كلنا بمنطقة
بغرفة، بنفس اليوم بالعصر، صاروا الجيران يصرخوا اطلعوا
اطلعوا، عم بقولوا لازم نطلع. ما تتخلي كمية القوة والخوف،
بيتنا 4 طوابق، أخوي اللي استشهد ومرته وأولاده، كان تعبان
ومريض وبمشي بصعوبة، تخيلي كيف بدنا ننزله، من الطابق
الثالث للأول بسرعة وهو نايم، هاي كانت أول مأساة.

أنا حملت شنطة ظهر كبيرة كثير، وما سكتة بإيدي طفلين توأم
عمرهم 3 سنين، وما عرفت كيف بجري، وأهلي وراي، كلنا
بنجري وبنصرخ.

الستات طلعلنا، والشباب وإخوتي يضلوا. هم بدهنش يطلعوا، قرار
المغادرة كان قرار موت لإلنا بس لازم نطلع، لغاية ما نشوف شو
الوضع وبلكي نعاود نرجع.

نعيش ونحكي

شهادات نساء من غزة

إحنا سكان البريج، طلعلنا على بيت أختي، وتفاجأت هي تلاقينا
كلنا فجأة، خافت وارتعبت كثير. وصارت ناس تيجي، فاتوا ناس ما
بنعرفهم نزحوا. كان في صالونها أكثر من 100 شخص نساء
وأطفال. الفكرة إنه النساء تضطر تنزع.

بالآخر أجوا إخوتي، والمكان مكنش واسع، وقررنا نتفرق، وما
نكون بمكان واحد، عشان يكون محل يوسعنا كلنا.

بنت أخوي (ت) كانت جاي من السويد زيارة، استشهدت هي
وأولادها، ولدين وبنيتين. دار أخوي، كل العيلة، مرتته، أولاده
وبنات والأحفاد، 12 شخص، غير أهل زوج بنته.

انقسمنا، قعدنا 3 أيام وكنا نحاول نتواصل مع بعض، وبعد ما
شفنا القصف بكل مكان، قلنا خلص خيلنا نرجع بيتنا.

يوم 15.10.23 بنت أخوي (ت) اللي من السويد، كلمتني وقالتلي
إنه حاولت مرتين تروح على معبر رفح، عشان تحاول تطلع هي
وأولادها. أجتني رسالة منها أنه يمكن أعاود أطلع وديروا بالكم
على حالكم، بعدها بعثت كمان رسالة إنه خلص المعبر سكر،
مش رح تقدر تطلع.

وصلنا خبر إنه بيت أخوي انقصف، مربع كامل، راحوا إخوتي
يشوفوا البيت، لاقوه ع الأرض.

نعيش ونحكي

شهادات نساء من غزة

ما بتتخلوا، ولا بتمنى حدا يسمع هيك خبر. ما كنت مصدقة،
مش عارفة هو أنا كنت نايمَة وصحيت ولا شو، فهمت إني
صحيت ع حياة مدمرة. ساعة يقولوا ما استشهدوا، مصابين.

﴿أ﴾ ابن أخوي كان رايح يجيب لبنته دوا، بنته أجت بعد 6 سنوات،
زراعة ﴿ز﴾، وهي جميلة جدًا وزكية جدًا، هي كانت كل حياته،
وهي متعلقة في أبوها كثير. ﴿أ﴾ نجي، مرتته وبنته راحوا، وأبوه
وأمه، وإخواته راحوا.

﴿ح﴾ بنت ﴿س﴾، بنت أخته ﴿أ﴾، بنت بنت أخوها ل ﴿أ﴾ هي نمره 2
بالعيلة من بين 4، عمرها 8 سنوات، طلعت ع السوبر ماركت
تشتري، وما في اتصالات، وبصعوبة بنحاول نفهم شو صار، صاروا
يقولوا في منهم تحت الأنقاض وسامعين صوت. جابولي ﴿ح﴾،
وقالتلي إنها مكنتش بالبيت، راحت تشتري.

الجثث كلها تحت الأنقاض، طلوعوا قطع، ما في جثة طلعت
كاملة. مش عارفين مين هادا ومين هادا، كل يوم بطلعوا
وبدفنوا شوي. طلوعوا، أولاد وبنات إخواتي تحت الأنقاض، ما
طلعوهم.

تخلوا تصيروا تتمنوا لما تستشهدوا ما تتقطعوا، تلاقوا جثث
تضموها. تلاقوا حدا تحضنوه.
أنا بحكيلك وبيكي كثير.

نعيش ونحكي

شهادات نساء من غزة

أنت بوضع كثير صعب، ووجع وألم، بس مجبورة تكوني قوية،
عشان تقدري تقوي إخوانك، وتقدري تطبطيني ع وجعهم،
تحضنينهم. لما حضنت (ح)، تخيلي وجعها، لا أم لا أبو، لا ست، لا
إخوة. و(ح) مقدرتش تطلع معي، بقيت مع أخوي، ما في إلهي
أوراق. أوراقها بالبيت، كله راح. أوراق وفلوس وذهب، ما طلع من
البيت إشي، تراب. تخيلي حياة طفلة ما إلهي حدا، ما ضلها حدا.
عيلة كاملة تروح. هادا يوم 15.10.23.

ما لحقنا نفوق من الألم، يوم 17.10.23 ابن أختي كان طالع
لمؤسسة، أختي (ه) أم (أ) اللي رحنا عندها أول مرة، نزحنا
عندها. أختي عرفت، ما في اتصالات.

بنتها (أ)، طيبة أسنان، كانت جاي من 3 أيام، وكانت خاطبة
واحد مصري، طلعت ع مصر جهزت كل شي، ورجعت عشان
تعمل حفلة وداع وترجع تسافر. بدلتها كانت جاهزة، وكانت
موصية ع الطرحة من القدس.

بعثتلي رسالة عليّ وقالتلي خالتو وحياتك تهدي ماما، إمي
منهارة. وأنا قتلها أنا مش قادرة أواسيها وأهديها، أنا كمان
منهارة. بعد من أقل من 3 دقائق، بتصل ابن أختي من مصر،
بصرخ وبصوت لأخوي أهلي استشهدوا. ما صدقنا، هلا حكي
معهم. أخوي واقف مش عارف شو يعمل، حسيت، سألته
وقالي انه شكله دار أختي انقصت. اتصل يسأل ناس، وما
عرفوا يقولولنا إذا بيت أختي كمان.

نعيش ونحكي

شهادات نساء من غزة

خلال ربع ساعة، مش عارفين حالنا، فتت بحالة هستيرية،
وبخبط راسي بالحيط. لغاية ما أجانا الخبر الأكيد، بيت أختي تدمر
بالأرض وباللي فيه. اللي راحوا، (أ) العروس اللي الها يومين جاي
من مصر، وأختي وجوزها، مرة ابن أختي، (أ) اللي هو بمصر،
وبنتهم وابنهم، نجي ابنهم واحد. و(ه) ومرته وأولادهم وبناتهم،
و(أ) وبناته التنتين، مرته نجيت وكانت حامل. مرته طلعت من
تحت الأنقاض ابنها وبنت سلفها. البيت راح هو واللي حواليه. 16
واحد. البيت اللي جنب بيت أختي، كان فيه 58 شخص، كلهم
راحوا.

تخلي أنت كيف بده يكون شعورك بيومين تفقدي هدول، قد ما
بدي أوصف مش رح أقدر أوصف الحالة اللي كنت فيها. ما
أعطونا مجال نحس بالألم، إلا بعد ما طلعت من غزة. كنا
مشغولين بالحياة الصعبة، القصف والأصوات، والمي والطبخ،
تحصلي دوا لهادا الطفل المريض. يومنا كان كثير مليات وصعب
ورعب.

وبقينا بهادا الوجع وهادا الألم، فش كهربا، فش مي، فش وسيلة
اتصالات، فش أكل، في أطفال فش إشي لإلهم. إحنا كنا عايشين
بوضع مرتاح، بيوتنا مرتاحة. كثير كنا عايشين منيح، ناس بدها
حياة وبدها تعيش أولادها. ما بدنا حروب.

نعيش ونحكي

شهادات نساء من غزة

آخر سنة لإلي كانت كثير حلوة. شو الوطن بعينك كانوا يسألوني،
كنت أجاب "الوطن أهلي". أنا أصغر واحدة من أهلي، كثير
متعلقة فيهم وهم متعلقين في. ارتبطت بشخص وتركته
عشان ما أترك أهلي. أخوي اللي استشهد هورباني، بابا توفي وأنا
17 سنة. مع أخوي الكبير كان يعتبرني بنته.

أنا إخواتي وخواتي كل واحد ماخذ من قلبي قطعة، ما بقدر
أعيش بدونهم. بس هيني عايشة، بالقوة. فعلياً روجي معهم،
قلبي معهم.

إحنا كنا نعرف الأخبار عن العيلة، من العيلة بالسعودية، في
مجموعة بالواتس اب.

يوم 25.10.23 قعدنا بعد المغرب، ووصلنا خبر دار عمي وأولادهم
وبناتهم وعائلاتهم. استشهد بحدود 14 شخص، غير عائلات
وبناتهم.

أولاد خالي كمان راحوا. كانوا بيتهم لغاية 2.12.23، كمان بناية 4
طوابق، كل البناية نزلت فيهم. كلهم استشهدوا طلع من البيت
طفل عمره 3 سنين. ابن خالتي طالع يجيب لبنته من ذوي
الاحتياجات الخاصة، رايح يشتريها حليب، قنصوه. ما عرفوا
مرته وبناته، إلا بعد وقت. دفنوه بمستشفى وما ودعوه أهله.

نعيش ونحكي

شهادات نساء من غزة

إحنا عايشين برعب أكبر، نزحوا ومش عارفين شو بده يصير. جو نفسي مش طبيعي

حتى لو إحنا بمصر، مش أمان، إحنا عايشين كأنه بغزة.

هاي تجربة مرعبة ومؤلمة لكل النساء، رعب بالعينين، كلنا تاركات حياة، وذكريات، ومعيشة حلوة. مش عارفات إحنا راجعات ولا لأ. إشي كثير صعب، كلها ألم، كل الوقت نبكي. فقدنا إشي كثير كبير، مجرد طلعتنا من البيوت. البيت مش حجر بس، البيت ناس وذكريات وحياة ولمات حلوة. البيت تعب، تعبوا فيه كل دقيقة، تعبوا بنائه، بفلوسه. قديش الحسرة والألم بعينينا ونظراتنا. كنا بنواسي بعض وبنقول "كلها كم يوم وبنرجع، رح نرجع".

نساء طالعة بأواعي الصلاة، أو نساء محجبة طالعة بشعرها، عشان يحموا أولادهم، المهم يطلعوا.

قديش بتحملوا النساء هاي، متحملت رعب، أزواج بالبيوت، حاملات أطفالهم، وفي أطفال مش معهم. العائلات انقسمت، كان في إشي مع الزوجة وفي مع الزوج، ما في أماكن توسع الكل، اضطروا يتقسموا. بعد فترة بدينا نسمع عن مآسي، انه في نساء نسيت أطفالها، أو تفرقت عن أطفالها وما بتعرف وينهم، أطفال ضاعوا.

نعيش ونحكي

شهادات نساء من غزة

إحنا كنساء عايشات بعذاب، من يوم ما نولدت. كل يوم ما أحس بأمان، بتيجي حرب وبتضيّع كلشي. نفسنا نحس إتنا شعب متلنا متل أي شعب تاني، صرنا نحس الحسرة بعينين الناس والنساء.

آخر سنة، البلد تطورت كثير، وصارت بتجنن، صحيح فيها صعوبات بس كنا نتجاوزها، في حصار بس حاولنا نمشي أمورنا بنينا بيوتنا. أماكن وبحر غزة، ريحته بتبرد الروح، نسمة الهوا تبرد روحنا. أخ بس، كلشي راح. غزة العشق والحب، والحياة، والذكريات، والأهل، الجمعة واللمة. كله انفقد، وتدمر.

بالإضافة للصعوبات والنفسية، بهمني تعرفوا قديش النساء بتعاني، الحياة اليومية صعبة، بلا كهربا وبلا تواصل. بكفي إنه ما بتقدر تتواصل مع أهلها، زوجها وأولادها وبناتها اللي اضطرت تتفرق عنهم. ما تعرف عنهم إشي. أكل ما في، غسيل النساء تغسل ع أيديها، وقديش تعب وإرهاق، عيلة مكونة من 6 أفراد، رجعا للحياة البدائية. فش كيف تأمين للأطفال والطفلات وجبة أكل. وجبة الأكل معاناة، ما في طحين، بذك تعجني. إذا بذك خبز، إذا ما كان في قصف، بذك تنزلي من ساعات الفجر تستني بالدور. بذك تعجني؟ بذك تجيبي حطب ونار وتحاولي تعجني.

نعيش ونحكي

شهادات نساء من غزة

مي للغسيل، مي للشرب، مي للحمام. بتفوتي مرة واحدة ع الحمام باليوم، وأصلاً في كثير دور. العبء على المرأة، كله بطلب منها، وماخذ حيز من حياة النساء.

شوفي شكل وجه وإيدى النساء، كلنا ملامحنا تغيرت، إحنا تغيرنا. غير المواضيع الصحية، النظافة. غير موضوع الدورة، النساء صارت تضطر تاخذ حبوب منع الحمل عشان ما تيجيها الدورة. ما في فوط، الفترة هاي المعاناة صارت أكثر.

غلاء المعيشة، السلعة نادرة، وبطل في مصاري. شعبنا قبل كان عايش كل اليوم بيوم، شغل يومي، أجر يومي. وهلا فشت إشي.

تخلي نساء أولادهم وبناتهم يمرضوا، لما في طفل يمرض ومشت ملاقية كأم دكتور أو عيادة، أو مستشفى. ولا تلاقي صيدلية فيها أدوية. شبه معدومة.

مصر الوضع هون صعب، دولة سيئة. لا بنقدر ناخذ إقامة، ولا نفوت مدارس، ولا نشغل. كثير سيئين. وين بدنا نروح؟ صرت أقول لأي حد الاقليمي شغل. والأهم هلا تحاول أطلع أهلي وأخوي اللي بقي من رفع. بطلبوا كثير، وجعنا لسا وجع. ادعولي بالصبر إنه عقلي يبقى.

تم الحصول على هذه الشهادة بشكل مباشر من المرأة بواسطة إجراء مقابلة معها في تاريخ 24.01.2024

نعيش ونحكي

شهادات نساء من غزة